

Bil. 15

Selasa

9 April 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT PERTAMA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Keperluan Pemasangan Lampu Jalan di Jalan Sg. Lembing/
Route C4 dan Route 231 daripada Persimpangan
Plaza Tol Kuantan sehingga ke Bandar Sg. Lembing**
- *YB. Tuan Mohd Shahr bin Abdullah (Paya Besar)*

[Halaman 1]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT PERTAMA**

Selasa, 9 April 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Tuan Nga Kor Ming)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Keperluan Pemasangan Lampu Jalan di Jalan Sg. Lembing/Route C4
dan Route 231 daripada Persimpangan Plaza Tol Kuantan
sehingga ke Bandar Sg. Lembing**

2.34 ptg.

Tuan Mohd Shahar bin Abdullah [Paya Besar]: Terima kasih Tuan Yang di-Pertua. *Bismillahir Rahmanir Rahim. Assalamualaikum warahmatullah wabarakatuh.* Terima kasih Tuan Yang di-Pertua. Saya ingin membangkitkan berkenaan permasalahan yang dihadapi masyarakat di Parlimen Paya Besar khususnya di DUN Sungai Lembing iaitu keadaan jalan yang gelap dan tidak selamat, terutamanya pada waktu malam di sepanjang Jalan Sungai Lembing/Route C4 dan Route 231 sejauh 30 kilometer daripada Persimpangan Plaza Tol Kuantan sehingga ke Bandar Sungai Lembing.

Tuan Yang di-Pertua, Sungai Lembing merupakan sebuah kawasan di bawah Parlimen Paya Besar yang mempunyai pelbagai potensi untuk dibangunkan sebagai sebuah pusat tarikan pelancongan bertaraf dunia. Dengan sumber dan keadaan yang sedia ada, banyak penambahbaikan dan pembangunan yang terancang boleh dilaksanakan selaras dengan usaha menjadikan kawasan Sungai Lembing sebagai Tapak Warisan UNESCO yang diiktiraf peringkat global. Antara pusat tarikan pelancongan termasuklah Muzium Sungai Lembing, Lombong Biji Timah Bawah Tanah, Jambatan Gantung Kolong Pahat, Gunung Tapis, Air Terjun Pelangi, Bukit Panorama dan Gua Charas. Tuan Yang di-Pertua, namun jika

dilihat keadaan terkini terutamanya pada waktu malam, keadaan di sepanjang jalan kawasan tersebut amat gelap dan membahayakan pengguna jalan raya yang menggunakan laluan.

Situasi ini menyebabkan banyak kemalangan berlaku termasuk kemalangan maut, malah tidak terkecuali juga keadaan jalan yang terlalu gelap yang akan mengakibatkan habitat semula jadi dan haiwan ternakan seperti lembu turut menjadi mangsa kemalangan akibat pelanggaran oleh pengguna jalan raya yang mengakibatkan kematian kedua-dua belah pihak.

Keadaan mendesak inilah yang memerlukan pemasangan lampu jalan yang perlu disegerakan dalam memastikan keselamatan dan kesejahteraan rakyat terutamanya mereka yang menggunakan jalan tersebut terjamin. Sepanjang jalan ini juga merangkumi 29 buah Lokaliti Kampung dan kediaman dengan kapasiti penduduk seramai 16,000 orang. Dengan jumlah yang besar ini akan menyebabkan lebih banyak kemalangan akan berlaku jika tidak diselesaikan segera.

Oleh itu Tuan Yang di-Pertua, usaha ke arah menambah baik infrastruktur termasuk kemudahan lampu di kawasan tersebut perlu juga dinaiktarafkan dan direalisasikan. Justeru, saya ingin bertanya, apakah pendirian kerajaan untuk melaksanakan usaha tersebut? Apakah jadual kerja untuk memulakan dan menyiapkan projek tersebut?

Saya mohon jaminan kerajaan agar menimbang perkara ini dengan penuh komited, memandangkan projek-projek ini berkait secara langsung dengan keperluan penyelesaian rakyat dan seterusnya menjamin kesejahteraan rakyat secara keseluruhan. Sekian sahaja ucapan saya. Terima kasih Tuan Yang di-Pertua.

2.37 ptg.

Timbalan Menteri Kerja Raya [Tuan Haji Mohd. Anuar Mohd. Tahir]: Tuan Yang di-Pertua, selamat petang dan salam sejahtera. Ahli Yang Berhormat Paya Besar, saya sangat kagum dengan Ahli Yang Berhormat, sangat komited untuk kawasannya dalam semua isu-isu yang berkaitan. Semalam pun Ahli Yang Berhormat Paya besar Tuan Yang di-Pertua, juga di Kamar Khas ini bertanyakan isu yang lain tetapi dalam kawasan Parlimen beliau.

Timbalan Yang di-Pertua [Tuan Nga Kor Ming]: Ada sajak untuk Yang Berhormat Paya Besar.

Tuan Haji Mohd. Anuar Mohd. Tahir: Saya hari ini sediakan sajak untuk hendak dibaca di UIA nanti, '*on dear Yasin*'. Palestin punya *issues*. Jadi tiada sajak untuk Yang Berhormat Paya Besar. Tuan Yang di-Pertua, kementerian ini mengambil maklum berkaitan

dengan usaha untuk menjadikan kawasan Sungai Lembing sebagai tapak warisan UNESCO yang diiktiraf di peringkat global dan pusat tarikan pelancongan setempat.

Untuk makluman Ahli Yang Berhormat juga, kementerian ini mengambil maklum tentang laluan ini yang gelap dan tidak mempunyai lampu jalan. Berdasarkan data trafik sedia ada, secara keseluruhannya isi padu trafik harian di laluan ini tidaklah begitu tinggi. Masih rendah. Sekiranya terdapat peningkatan pembangunan serta keperluan pemasangan lampu jalan, pelaksanaannya boleh disyaratkan dalam pembangunan tepi jalan pada masa yang akan datang.

Pendirian kementerian ini jelas iaitu sentiasa berusaha untuk memastikan keadaan Jalan Persekutuan sentiasa berada dalam keadaan selamat, baik dan selesa kepada semua pengguna jalan termasuklah menyediakan situasi pemanduan yang baik pada waktu malam.

■1440

Dalam Rancangan Malaysia ke-11 (RMKe-11) Tuan Yang di-Pertua, melalui Program Menaik taraf Infrastruktur Keselamatan Jalan Raya, pemasangan lampu jalan di Jalan Persekutuan adalah antara skop yang disediakan di lokasi kerap berlaku kemalangan, dengan izin, (*blackspots*) selain daripada menaik taraf selekoh, melebarkan dan menurap bahu jalan, menambah baik perabot jalan dan lain-lain.

Sejak tahun 2016 sehingga 2018, sebanyak 57 lokasi telah siap dirawat manakala tahun ini pula sebanyak 56 lokasi *blackspot* akan dirawat dan dilaksanakan di seluruh negara. Yang Berhormat, walau bagaimanapun, sukacita saya memaklumkan, menurut kajian yang telah dibuat oleh pihak kami, laluan ini tidak tersenarai di dalam lokasi kerap berlaku kemalangan yang tinggi pada tahun ini berdasarkan data tiga tahun kemalangan yang terkini.

Tidak dapat dinafikan memang ada kejadian-kejadian kemalangan tetapi bukanlah kita boleh— tidak tersenarai sebagai *accident prone roads*, dengan izin Tuan Yang di-Pertua. Apa pun kita akan sama-sama memberi perhatian dan memerhatikan supaya apabila sampai masanya perlu, kita akan ambil tindakan Tuan Yang di-Pertua. Okey, *Assalamualaikum warahmatullah wabarakatuh*. Terima kasih.

Timbalan Yang di-Pertua [Tuan Nga Kor Ming]: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Rabu, 10 April 2019.

[Kamar Khas ditangguhkan pada pukul 2.42 petang]